

Poslanici koji bojkotiraju rad Parlamenta ugrožavaju demokratiju i trebaju biti sankcionirani

Visoki predstavnik, Christian Schwarz-Schilling je danas pozvao da se protiv poslanika koji putem napuštanja sjednica Parlamenta dovode do zastoja u razvoju demokratije trebaju biti sankcionirani.

«U normalnim evropskim državama, poslanici koji bojkotiraju rad Parlamenta i napuštaju njegove sjednice moraju snositi posljedice», izjavio je danas visoki predstavnik. «Zatražio sam od predsjedavajućeg i njegovih zamjenika da predlože sankcije koje će biti donesene ukoliko se ponovi bojkot koji traje već nekoliko sedmica. Oni su obećali da će svoje preporuke u pogledu ovih sankcija dati u roku od mjesec dana.»

Visoki predstavnik se obratio novinarima na stepenicama zgrade Parlamenta BiH. Zadnja sjednica Parlamenta održana je 24. maja kada je visoki predstavnik Parlamentu prezentirao svoj plan reformi, koji bi ukoliko bude usvojen tokom ljeta mogao pomoći u otvaranju novih radnih mjesta i poboljšanju životnog standarda u Bosni i Hercegovini.

Od trenutka kada su poslanici iz reda sprskog naroda napustili sjednicu, Parlament je prestao s radom.

Visoki predstavnik je ovu situaciju opisao kao «neprihvatljivu za građane i narode Bosne i Hercegovine i dodao: «U demokratiji, Parlament je najviše zakonodavno tijelo. Ukoliko Parlament prestane s radom demokratija prestaje da funkcionira.»

«Građani Bosne i Hercegovine su glasali za svoje predstavnike, pružajući im povjerenje. Parlamentarci nikada, ponavljam nikada ne bi trebali oduzeti građanima njihovo demokratsko pravo na političku zastupljenost.»

Visoki predstavnik je naglasio da iako dejtonski Ustav sadrži mehanizme kojima se štite prava svih konstitutivnih naroda Bosne i Hercegovine, pravo veta se može koristiti samo na osnovu argumenta u svakom pojedinačnom slučaju a ne za spriječavanje održavanja sjednica Parlamenta.

«Veto se ne može koristiti kako bi se opstruirala demokratija i blokirao dijalog.» rekao je visoki predstavnik. «Korišćenje veta u te svrhe znači ugrožavanje vitalnih interesa ne jednog, nego svih konstitutivnih naroda Bosne i Hercegovine.»

Visoki predstavnik je pozdravio činjenicu da će u ponedjeljak Parlament nastaviti s radom. Međutim, dodao je da iako to predstavlja korak u pravom smjeru time se ipak «ne riješava pitanje poslanika koji blokiraju rad Parlamenta, ni pitanje ugrožavanja njegove reputacije, kao ni pretvaranje ove institucije u «inat kuću».

«Ovaj Parlament treba usvojiti niz zakona: Zakon o visokom obrazovanju, Zakon o obligacijama, Zakon o superviziji banaka, Zakon o lijekovima, kao i zakone u drugim ključnim oblastima koje takođe treba usvojiti. Ovi zakoni imaju suštinski značaj za dobrobit svih građana ove zemlje, bez obzira na njihovu etničku pripadnost.»

Na kraju, visoki predstavnik je naglasio da bh. problemi trebaju bh. rješenja. «Čini se da neki smatraju da bih ja trebao iskoristiti svoje bonske ovlasti kako bih nametnuo ove zakone i kaznio ili smjenio pojedince koji blokiraju rad Parlamenta. Međutim, ja ne namjeravam raditi posao koji moraju raditi institucije i izabrani lideri ove zemlje.»